

Fabrica di papel sanitario Carex Paper a kima

Dos truck y un forklifter den e edificio a kima por completo



ORANJESTAD

Diasabra mas o menos 2'or di marduga, Polis, Bombero y Ambulance a acudi na Carex Paper situa den Belgiestraat na Eagle cu tabata na candela. Bomberonan mester a actua rapido pa evita cu e candela plama. Gran parti di e oficina a wordo salva mientras cu e resto di e edificio a keda totalmente destrui.

Les a pagina 2.

Fabrica di papel sanitario Carex Paper a kima

Dos truck y un forklifter cu tabata den e edificio a kima por completo



ORANJESTAD – Diasabra mas o menos 2'or di marduga, Polis, Bombero y Ambulance a acudi na Carex Paper situa den Belgiestraat na Eagle tabata na candela. Na e sitio, Bon Dia Aruba a entrevista e oficial cu tabata na mando esta sr. de Cuba.

Den prome instante, Bombero a wordo informacu ta e edificio di Playa Liquor tabata completamente na candela. Ora Bombero a yega na e sitio a constata cu no ta Playa Liquor sino e edificio banda pazuid di dje esta Carex Paper tabata na

candela.

CONFRONTA PROBLEMA

Bombero a haye confronta cu varios problemanan ya cu e edificio di Carex Paper tabata completamente na candela e momento ey, e construccion di metal cu tabatin a colaps caba. Ademá a constata cu entre e edificio di Carex Paper y e edificio panoord di dje esta Dushi Icecream y Playa Liquor tabatin boternan di gas poni y e muraya tabata di blokinan cu buraco cual tabata forma un peliger pa e

candela sigui expande bay e direccion ey.

CONTENE E CANDELA

Señor de Cuba a muestra cu mirando e peliger di expansion di e candela, e prioridad na e momento ey tabata contene e candela pa e keda den e edificio di Carex Paper y no plama bay pa e otro edificionan den cercania. Door cu ta trata aki di un edificio bastante grandi, a saca tur Bombero cu tabata na warda e momento ey esta 21 persona y tur e trucknan cu tabata disponibel a despacha pa

e sitio. Sinembargo a usa dos truck di paga candela y e “hoogwerker”. Un total di 15 Bombero tabata directamente involvi den combatimento di e candela mientras cu e restonan tabata cla pa remplasa nan ora di descanso.

A LOGRA SCAPA OFICINA

Ta asina cu Bomberonan a logra scapa un cantidad di articulonan di e oficina mes pa e doñonan.

DOS TRUCK Y UN FORKLIFER A KIMA

Bon Dia Aruba por a compronde cu dos truck y un forklifter di e compania cu tabata staciona den e edificio, a kima completamente.

Ta asina cu ora Bombero a logra contene e candela, a bay overna paga e contenido den e edificio cu ta un gran cantidad di papel y foam. Pa combati e candela,

Bombero a haci uso di un pos di awa destina pa Bombero. Sr. de Cuba a splica cu den prome instante ora cu e noticia a drenta cu ta Playa Liquor lo tabata na candela, a pensa cu lo bay manda slangnan grandi pa lama pa asina por haya e cantidad suficiente di suministro di awa. Sinembargo despues a dicidi di usa un pos cu a percura pa e suministro suficiente pa combati e candela.

E momento ey tabata dificil pa determina unda e candela a cuminsa ya cu ainda tabata den e proceso di paga e candela. Sr. de Cuba a bisa cu a papia cu e doño kende a splica unda tin cosnan pone den e edificio y despues lo bay investiga unda e candela a origina.

Bon Dia Aruba por a compronde cu tin sospecho cu lo ta chollernan lo a sende e edificio na candela ya cu patras di e edificio, tin chollernan ta reuni.